

Goengda, Bouxdazroen Gou

Mboengq cuengqgyaj, gou bae lajmbanj ranz goengda youq.

Baez daengz ranz goengda, gou couh soh bae geij gaiq naz goengda. Gou da raen baenz benqhung baenz benqhung gofaiq, youq ndaw naz gofaiq, miz boux ndangngaeuz sugseg ndeu cingq haenqrengz saj yw, fajnaj lwenq saekluengz de hanh lae mbouj dingz, neix couh dwg goengda.

“Da ha, ndat baenzneix bae, langh naetnaiq couh yietnaiq yaep ndeu ba!” Baez raen gou daengz, goengda angq dangqmaz bae, hoeng mbouj cuengq gaiq hongdawz saj yw haenx. “Mbouj baeg, mbouj baeg, mwngz bae lajraemh naengh caj, gou saj gaiq neix liux couh daeuj lo!” Da muengh gvaqbae, mbwn ha mbwn, gaiq naz hung baenzneix, saj fog ndeu couh deng naetnaiq yaekdai bae! Vanzlij, seizneix ndit ndat lai, gij ywnungzyoz neix heiq noengz coeg ndaeng lai, deng ndum gij heiqyw neix liux couh yaek ngunh bae. “Da ha, mwngz ngoenz neix saj di ndeu, ngoenzcog saj di ba! Mbatndeu saj liux dwgrengz lai lo!” Goengda daengx roengzdaeuj lo, cimyawj doenghnaz, riu naeuz: “Vunz nguh naz saek seiz, naz nguh vunz baenz bi! Guh gijmaz saeh cungj yaek guh bae gonq, geij

ngoenz laeng neix yaek doek fwn lo!”

Gangj sat, goengda youh gaem gaiq ganjsajyw, youh saj yw moq lo. Gou yawj aenndang mizdi gaeuz haenx, sim couh gingq de dangqmaz bae. Guh saeh aeu seizseiz haenqrengz cengguh, neix gangj ngaih, guh hoj!

Gvaq yaep ndeu le, aiq dwg naetnaiq lo, goengda naengh youq dwngnaz yietnaiq. Gou raen naengnoh de deng ndithaenq dak baenz ndaemndet bae, fajnaj nyaeuqnyat de, deng ndwenngoenz dik miz haujlai riznyaeuq lo. Gou yawj doenghgij gofaiq maj ndaej mwnhoengh, ndawsim gag cam swheij: “Seizndat miz rumzhaenq lai, langh miz rumzhaenq daeuj, doenghgij gofaiq neix deng mbouj deng ci vaih bae ne?” Goengda yawj le nazgofaiq, menhmenh naeuz: “Dwg bw, raq rumz ndeu mbanj goj vaih doenghgij gofaiq neix, hoeng aenvih mbanj miz rumzhaenq couh vit hong mbouj guh, neix gofaiq ndei ndeu cungj ndaem mbouj baenz lo!” Dingq le gou ndawsim doeksaetyat.



Dwg lo, doengda gangjvah miz dauhleix, vunzraeuz langhnaeuz mbouj gag haenqrengz, couh gaej bae gvaq mbwn ndaq vunz lo! Gou ngeix daengz hagsib, saedcej vunz raeuz, roen raezrangrang ne, raeuz guhsaeh cungj

aeu lumj goengda yienghhaenx miz cungj cingsaenz “dajcae dajndaem” neix. Couhsuenq baihnaj roen miz oen lai nya’ nyangq bae, raeuz hix aeu gaem cax faenz oen, hai rangh dieg moq ndeu; couhsuenq baihnaj roen bonzbanz lailai, youh lau gijmaz ne? Ginggvaq haemzhøj guh baenz saeh, haengjdingh sawj vunz lai gamjdoengh, lai insik! Gaej gag daengz donh couh ndek couh vit bae, langh mizdi gungzhøj couh ndek vit, mbouj

bae haenqrengz sawqguh, nyaenx couh guh maz cungj mbouj baenz lo! Baez ngeix daengz neix, gou coglaeng doegsaw, gvaq saedcej, caen aeu haenqrengz nyinhcaen guh!

Goengda cae naz, gaenxguh hanh doek roengz namh, ndaej cimz daengz gij feihdauh soundaej doenghyiengh dajndaem. Raeuz ne, hix aeu rox “dajcae” ciuh vunz raeuz.

(Vuz Youh)



Duzrwi

Gou deng duzrwi ndat le, fajnaj foeg baenz gyauejmou bae, lwgda cungj bienq iq lo, ninz nanzanz cij ninz ndaej ndaek bw.”

“Duzrwi! Boh ha, duzrwi daeuj moq lo!” Gou fangzhwnz deng doeksaet ndiusingi.

“Ninz ha, gyanhwnz duzrwi mbouj okdaeuj.”

“Gou lau duzrwi! Aiyo, in lai lo. Boh ha, gou in lai!” Gou in lai youh daej moq lo.

“Gaej daej lai, boh lwnh aen gojgaeq ndeu hawj mwngz dingq, baenz lwi?”

Gou gyaed dingq gojgaeq, yienghneix couh mbouj daej lo.

“Lwnh aen gojgaeq duzrwi bw. Duzrwi mbouj luenh ndat vunz ne.”

“Nyaenx de vihmaz ndat gou ne?”

“De laihnaeuz mwngz yaek gyongz aenrongz de. Mwngz dwg mbouj dwg aeu ngafaex fad duzdaek ne?”

“Gou cungj yawj mbouj raen rongzduzrwi ne.”

“Wgo! Baezneix dwg duzrwi gauj loeng lo.” Boh laebdaeb naeuz dem, “Duzrwi deng dwk cij ndat vunz, gyoengqde yaek hendawz ndei aenrongz gyoengqde, hendawz ndei dangzrwi. De yienghneix guh dwg vih gyoengq doengzdoih de.”

“Nyaenx hix dwg vih swheij lwi?”

“Nauq bw, duzrwi ndat vunz de mbouj vih swheij ne. Duzrwi ndat vunz le, couh deng dai bae. De miz saenj laez ndeu ndwi, de aeu laez hoh ndang, baez ndat vunz le, saenj laez de couh mbouj miz lo. Duzrwi mbouj miz laez le, couh deng dai bae. Hoeng, mbouj miz saek duz lau dai bw.”

“Duzrwi mbeidaeuz raixcaix! Ngoenzneix duzrwi ndat gou haenx, hix deng dai bae ma?”

“Wgo! Dai go!”

“Doeknaiq lai! Ai, cungj gvaiq gou.” Yienghneix gou couh mbouj lau duzrwi saek di lo.

“Fajnaj mwngz lij in lwi?”

“Mbouj in baenzlai lo……” Gou vubvubvev gag naeuz, gvaq yaep ndeu couh ninz ndaek lo.

(Daj 《Bonjsei Sim Lwgnyez》 (Veiz Gizlinz raiz) senj okdaeuj, Lwgfwngzmeh/卢奋长 hoiz)

Duz Saehaexma Dwggayez

Fwn gvaq mbwn gvengq, gou bae gyanhghongh guhcaemz.

Sawqmwh, gou yawjraen miz duz saehaexma ndeu menhmenh daj gokciengz raih gvaqdaeuj. Gou ngaem ndang roengz, nyinhnyinh caencaen cimyawj de. Saehaexma raih ndaej menhnyednyed, de ndang aemq aen byuk ndeu, dinggyaeuj daengi miz song gaiq mumhgaeu, laj mumhgaeu dwg doiq lwgda iqet de, baihlaeng lij miz diuz rieng dinjdet dem. Gou aeu fwngz lejlej bae bungq de, de lumj bungzdaengz vunzdig nei, sikhaek suk mumhgaeu, suk ndang haeuj ndaw byuk bae, yienghneix daeuj baujhoh swheij. Gou ganjgip aeu aen boi ndeu daeuj, siujsim yupyup dawz duz saehaexma cuengq haeuj gyanboi bae, caemhcai cuengq roengz di mbawbyaek hawj de gwn. Ngoenz daihngaih haetromh, gou hwnqdaeuj baez yawj, gij mbawbyaek cungj deng duz saehaexma gwn liux lo.

Duz saehaexma dwggayez raixcaix ha.

(Siz Gyahgaj raiz Ouh Caijfangh hoiz)

